

啥人是幸運 ê?

大衛王就入去，坐 tī 上主 ê 面前，講：「至 koân 上主 ah，我是啥人，我 ê 家算做甚麼，祢竟然 chhōa 我到 chit-ê 地位？」
 (《全民台語聖經》撒母耳下卷 7：18)

大衛 (Ta-bit) tiòh 驚 kah gāng 去。上帝已經為伊做 hiah chē tai-chì，chit-má 上主 koh 應允 beh 高舉伊 kah 伊 ê 家族。救世主 beh tùi 大衛 ê kián 孫出，koh beh 掌權到永遠。

大衛 o-ló 無 soah；上帝 ê 恩典 hō 伊 驚畏，koh hō 伊 謙卑落來。雖然咱 tiān-tiān 無 án-ne 想，m̄-koh，大衛知影，伊所完成 ê 大 tai-chì—剷死歌利亞、pah 敗腓利士人 kah 團結以色列人，chiah-ê tī 上帝 ê 整體計畫中根本 tòh 無算是啥物。雖然伊是 khah 特別，koh 有得 tiòh 大榮耀，m̄-koh，伊知影，所有 chiah-ê tai-chì 若 kah chit-ê siōng 新 ê 榮耀比起來，算是真微細 ê；大衛知影，tāk 項 lóng tiòh 感謝上帝。

上帝 mā 有通過耶穌基督，用各種方法賜福 hō 咱。總是，咱 kám 有 tiān-tiān 歸榮光 hō 上帝？咱無明白咱所有 ê 賜福—自由、健康、安全 kah 財富，lóng 是上帝慈悲 ê 手所賞賜 ê。事實上，無論咱有奉基督 ê 名做啥物來擴展上帝 ê 國度，咱所做 ê lóng bē 贏過大衛王 ê 所做。總是，大衛看伊人生 ê 成就，tī 上帝 ê 大計畫中，只不過是真

微細 ê tai-chì 而已。Án-ne，這對咱來講，是有啥物意思 neh？

上帝有選擇使用咱。上帝 hō 咱氣力、判斷力 kah 機會，hō 咱用家己 ê 方法來服事祂。上帝為咱做 ê，無限超過咱為上帝所做 ê；所以，咱若自我恭喜 kah 驕傲，其實是真愚戇 ê。若是咱想講上帝有咱是好運 ê，án-ne，咱是 hông 欺騙 ê。雖然咱 tī 生活中所做 ê tāk 項 tai-chì，只不過是歷史時間線 ê 一個閃 sih ê 點而已，m̄-koh，tī 上帝 ê 國度有可能是重要 ê。咱 ê 創造主 kā 所有 ê 一切 lóng 成做可能 ê，祂 mā 賜 hō 咱行 hiah-ê 好行為所需要 ê 氣力。

祈禱：親愛 ê 上主 ah，感謝祢賜阮每一工 lóng 有算 bē 了 ê 好物—日頭光、雨水、kah 活命本身。求祢教示我來問我家己，tú kah 使徒所問 ê 全款：「我所有 ê，kám 有啥物 m̄ 是 tùi 上帝領受 ê？」回答當然是「無。」。求祢幫助我會記得 chit-ê，而且 kah 大衛全款，獻 hō 祢熱誠 ê 感謝 kah o-ló。我奉耶穌 ê 名祈禱。阿們。

(2004.10.03)